

## (خلاصه پولیتیکه)

مقدم دخی بیان اولندیغی وجهله مؤخرأ طرف سلطنت سنیه دن  
سزاوار یوریلان مساعده یه مبنی من بعد مجموعه عاجزانه مرزه وقوعات  
پولیتیکه خلاصه سی دخی درج و علاوه اولندجق ایسده الحاله هذه  
میدانده بولنان مسائل مهمه نك منشأ و مقدمائی و شمیدی یه قدر تحول  
ایلدیکی صور و انقلاباتی بالا طرفی بیلندکجه بو مقوله خلاصه  
مطالعہ سندن کرکی **ک**بی استفاده اولنه میه جغندن بو دفعه مسائل  
حالیه نك علل و اسبابیله برابر البوم نه مر کرده بولندیغی بروجده ایجاز  
تحریر اولنمش و بمنه تعالی بوندن بویله دخی هر ماه طرفنده وقوعات  
آیه نك صره سیله یازیله جغنی درکار بولنمشدر

— ۰ —

## (ایتالیا مسئله سی)

ایتالیا قطعہ سنده یکریمی بش میلیونه قریب نفوس اولوب بونلر ملت  
واحدہ دن اولدقلری حالده حکومت مختلفه یه منقسم بولندقلرندن  
بر حکومت جسمیه تشکیلده دول معظمه صره سنده داخل اولق چوقدن  
برو ایتالیا لولرک اقصابی اماللری ایدی حکومت مذکوره دن ساردینیا  
دولتی ایتالیا لولرک بو اماللر نك اول و آخر حصولدیر اوله جغنی حس  
ایدرک تشکیل ایده جک هیئت جدیدہ حکمدارلغی شرفته نائل اولق  
ارزو سیله بونک تهیئت اسبابنه سعی و اهتمامدن خالی اولزدی دولت علیه  
ایله روسیه بیننده ظهور ایدن محاربهء اخیرده انکلسره و فرانسه  
دولتلریله متفقاً دولت علیه یه اعانه ایدرک محاربه نك ختامنده  
پارسله عقد اولنان مکالمه یه دخی داخل اولمش و اوچجی درجه ده  
بر دولت ایکن دول معظمه ایله برابر پارس معاهده سنی امضایه

موفق اولوب بو صورتله کسب شان و حیثیت ایلشدر و ایتالیا ممالکندن اولوب اوستریا دولتی تحت حکومتمده بولنان وندیک و لومباردیا ایالتلرینک استرادی ادعاسیله دولت مشارالها علیه اعلان حرب و فرانسه لوی دأره اتفاقته جلب ایدوب اشبو محاربه ده اوستریا لور مغلوب اولدیغندن فرانسه و اوستریا ایمپراطورلری بینده عقد اولنان ویلا فرانقه معاهده سی موجبجه ایالتین مذکوریتندن لومباردیا ساردنیا به الحاق اولندی بونک اوزرینه طوسقانه و پارمه و مودنه دوقه لقری دخی ساردنیا به التحاق ارزو ایدرک بو باده دولت مذکوره قرالی حشمتلو و یقتور امانوئل حضرتلری طرفه مخصوص و کبار ارسال ایلدی و قوعات مذکوره نک جریانی اشناسنده ایتالیا نک هر طرفه اختلال ظهور ایدرک امن و اسایش کلیاً منسلب اولغله ساردنیا دولتی بونک رفع و ازاله سیله اروپا موازنه دوله سنک محافظه سی ضمنده اهاب سنک ارزوسی وجهله ایالات مذکوره نک ساردنیا به التحاق وجوب درجه سنه وارمش اولدیغنی و بو قاعده به یعنی اهابلنک ارزوزینه مبنی ساردنیا ممالکندن اولوب فرانسه به مناسبت موقعیه سی بولنان صاوا و ونیس ایالتلرینی فرانسه به ترک ایده جکنی باتقریر رسمی دول معظمیه اعلان ایله تصدیق ایتدیرمکه موفق اولدی بو ائنده ناپولی دولتی ممالکنده دخی بعض اختلال اماره لری ظهور ایدرک اهالی قرال لری اولان ایکنجی فرانسوا نک حکومتمدن اظهار ناخشنودی ایله ساردنیا طرفه میل و انجذاب کوسترمش اولسیله بیک سکر یوز التمش سنه سی شهرمایسنده جنرال غاریبالدی معینده بر مقدار کوکللو عسکر اولدیغنی حالده سچلیا اطه سنه عزیمت ایدوب اورایه وصولنده عموم اهالی جنرال موسمی ایله برلشمش و قرال عسکر یله وقوعبولان

وقوع بولان محاربه زده غاریبالدی طرفی غلبه ایتمکله در عقب  
اختلال مملکتک هر طرفه سرایت ایدرک همان کافه اهالی قرال  
علیهنه قیام ایلدیکنه بناء ارتق قرال مشارالیه ناپولیده اقامت  
ایده میوب قاپو شهرینه چکلمش و اهالیکن دعوتی اوزرینه ساردنیا  
عسکری کله ریک شهر مذکوری حصر و تضیق ایلدیکندن قرال  
مشارالیه اوراده مقاومت ایده میدرک غایتا قلعه سنه تحص ایتمش و بر  
خیلی وقت اوراده غبورانه مدافعه ایلمش ایسده نتیجه سنده صلحه  
مجبور اولوب ایتالیا طو براغندن حقیقی شرطیه غایتا صورنده بولنان  
بر فرانسز کپسنه راکبارومایه عزیمت ایتمش و بو وجهله ناپولی ممالکی  
دخی کاملاً ساردنیا به منضم اولمشدر

معتاقباً حشمتلو پایا حضرتلرینک زیر اداره سنده روما ممالکندن بعض  
ایالاتده دخی اختلال ظهور یله ساردنیا به التحاق افکاری ایلرولسی اوزرینه  
ساردنیا عسکرینه مقابله ایتمک اوزره مشارالیه حضرتلری فی الاصل  
فرانسه لو جنرال لاموریسیر تحت قوماندن سنده اوله رق سوق ایتمش  
اولدینگی اردویه جنرال چالدرینی قوماندن سنده بولنان ساردنیا عسکری  
قاستلقیداردو نام محله به بالمقابله وقوع بولان محاربه ده پایا اردوسنک مغلوب  
و پریشان اولسنی روما ممالکندن مورس و اومبری ایالتلرینک دخی  
ساردنیا به التحاقی منتج اولمش و بر منوال محرر حشمتلو پایا حضرتلرینک  
زیر اداره سنده قالمش اولان بر قطعه صغیره ایله اوستریالو یدنده بولنان  
وندیک ایالتندن بشقه ایتالیا ک هر بر طرفی ساردنیا به ملحق اوله رق  
ساردنیا قرالی ایتالیا قرالی نامنی حاز اولوب مشارالیهک ایتالیا قرالینگی  
اوستریالودن بشقه دول معظمه سائر طرفندن دخی تصدیق قلمشدر  
فقط ایتالیا نلر بونکله قناعت ایتمیوب ایتالیا ک هیچ بر جزوینک خارجده

قالامسی و پاپانک مقر حکومتی اولان روما شهری ایتالیا پای تختی  
 اتخاذ قلمسی امل و ارزوسنده اولوب و نیک ایتالیا استخلاصی ممکن  
 کی کورینور ایسده روماک ایتالیا پای تختی اولسی حشمتلو پاپا  
 حضرتلری حکومت جسمائیه سنک بالکلیه اضملاند متوقف اولوب  
 بو ایسه ایتالیا نلردن بشقه رئیس روحانیلری بولندیغی سائر قتلواک  
 ملنک انفعالی موجب اوله جغه و فرانسه اهلایسی ایسه همان کافه  
 قتلواک اولدقلرندن پاپانک هر درلو مخاطره دن وقایه سی ایچون فرانسه  
 دولتی خبی و قتلبرو روماده مقدار وافی عسکر اقامه سنه مجبور بولندیغه  
 بنا روما اوزرینه هجوم اولمسی فرانسه عسکر یله محاربه یی و قتلواک  
 مذهبنده بولنان دولتلرک خصوصتی مؤدی اوله جغنی ایتالیا دولتی  
 بیلدیکندن روما مسئله سنک شمیدیاک حرباً حلندن صرف نظره وقت  
 مرهونه تعلیق اولمشیدی

بروجه مشروح روما مسئله سنک بر صورت مصلحانه ایله انحلالنه ترقب  
 اولنورکن جنرال غاریبالدی ایتالیاک جنوب طرفندن باشنه بر طاقم  
 کوکلو عسکر جمع ایدرک رومیای الورز و یاخود بو یولده اولورز دیو  
 شهر مذکور اوزرینه یوروک اوزره اولدیغی خبری ایتالیا قرالنه واصل  
 اولدقده غاریبالدی حاله براغلسه مشکلات موجودیه نظرا روما  
 انهمیه جعندن بشقه قتلواک مذهبنده بولنان دولتلر دخی منفعل  
 اوله رق روما مسئله سی بر قاندها دوچار صعوبت اولور ملاحظه سیله  
 مومی الیهک شو حرکتی تقبیح و کندوسنه عاصی نظریله باقیله رق  
 اوزرینه عسکر سوق اولمسی اهون شرین اولق اوزره اختیار ایلمش  
 و وقوع بولان محاربه ده غاریبالدی طرفی بوزیله رق کندوسی دخی  
 مجروح اولدیغی حاله طویلوب بوغائله مندفع اولشددر فقط غاریبالدینک

فوق الغايہ درکار اولان غيرت مليہ سنی و ناپولی مسئلہ سندہ مشہود  
 اولان خدمات عظیمہ سی جہتلہ بالجملہ ایتالیا اہالیسی بیندہ زیادہ  
 شہرت و اعتبار قزاقمش اولغلہ مومی الیہک بوصورتلہ دوچار حقارت  
 اولسی بالجملہ ایتالیا لوزک و باخصوص حین حاجتدہ ایتالیا دولٲک پک  
 زیادہ ایشنہ یارایہ حق اولان غاریبالدی طرفدار انک اشوی موجب  
 انفعالی اولسیلہ ایتالیا دولٲی بر موقع مشکلدہ بولندرق بوتک تعمیری  
 ایچون غاریبالدی حققدہ اتخاذ اولٲان معاملہ ینہ ایتالیا منافعی محافظہ  
 ایچون خلقلہ اعلاننامہ ل نشر ایدرک اہالیٲک بعض مرتبہ غلبان  
 افکارینی تسکین ایلہ برابر فرانسدہ عساکر مستحفظہ سنک رومادن  
 چکلمسی خصوصنہ خیلی چالشمش و حتی ایتالیاٲک رومانی حرباً  
 ضبطہ قوہ کافہ سی اولدیغنی مثبت فرانسدہ دولٲنہ کچندہ بر قطعہ  
 تقریر رسمی دخی اعطا ایلمش ایسدہ فرانسدہ دولٲی طرفدن مصلحت  
 ایکی طرفک یعنی ایتالیا قرالی حضرٲلریلہ حشمتلو پایا حضرٲلرینک  
 رأی و منفعتلرینہ موافق صورتدہ تسویہ پذیر اولدقچہ فرانسدہ  
 عسکرینک رومادن چیقمسی ممکن اولدیغنی و بو بابدہ ایتالیا دولٲی  
 حربہ تصدی ایدر ایسدہ فرانسدہ عسکری مقاومتہ مجبور بولندیغنی  
 جوابی اندیغندن بوتک اوزرینہ و کلانک تبدیلی اقتضا ایدرک موسیو  
 راتازی و وکلای سائرہ استعفا ایلمش و یرلرینہ وکلای جدیدہ انتخاب  
 اولمشدر

ایتالیا مسئلہ سنک خلاصہ سی بوندن عبارت اولوب روما مسئلہ سنک  
 بلا محاربہ حل۲ حققدہ دخی شمدی یہ قدر بر قاج صورت تصور اولمش  
 ایسدہ صور مذکورہٲک کافہ سی حشمتلو پایا حضرٲلرینک حکومت  
 جسمانیدن صرف نظر ایلمسنی انتاج ایدوب مشار الیہ حضرٲلری

ایسه بوکا هیچ بر وجهله یناشمامقده اولدیغندن مسئله مذکوره‌ک  
بلا محاربه حلی پک سامول دکلدیر

—0—

(پروسیا مسئله سی)

پروسیا اهلایسی نائل اولدقلری اداره مشروطه سایه سنده براز وقتدنبرو  
آسوده نشین اولهرق ممالک سائره وقوعات پولتیقیدسنه حصر افکار  
ایتمش اولدقلری حالده الیوم قراللی بولنان برنجی کلیومک صندالی  
حکومتده قعودینی متعاقب بعض حالات غیر مألوفه ظهوره کله‌رک  
اهالی مذکوره‌ک تخدیش اذهانی موجب اولشدر شوپله که قرال  
مشارالیه ولی عهدلیکی ائناسنده اصول سرستی طرفداری  
بولندیغندن عامه‌ک کندو حقنده میل و محبتی برکال بولنش ایسه‌ده  
ابتدای جلسوسندنبرو قوه بریه و بحریه سنی تکثیر ایتمک ارزوسنده  
اولدیغنی اظهار ایدوب فقط بونک اجرایی مبعوثان ملت مجلسنک  
تحصیل موافقته محتاج اولدیغندن کیفیت مجلس مذکوره موقع  
مباحثه قوندقدده اعضانک اکثریسی بونک ملت حقنده یسوده بر  
بارکران اوله جعنی بالبیان اظهار مخالفت ایملشدر بونک اوزرینه قرال  
مجلس مذکورک موافقتدن صرف نظراه ماده‌ی طوغریدن طوغری‌یه  
اصیلزادکان مجلسنه بالحواله اوراده مذاکره و تصدیق ایتدیرمش و بو  
ایسه قونستتسیون یعنی شروط اداره احکامنه مغایر اولدیغندن  
مبعوثان مجلسی طرفندن اشبو قرارک نا مشروع و غیر معتبر طوتلیسی  
اقتضا ایده جکنه اتفاق آرا ایله حکم اولندیغندن قرال مشارالیه ملت  
مجلسنک شو مخالفتنی کندوسنک حقوق قرالیه سنی مغل بر حرکت عدیله  
مجلس مذکوری درعقب قیاندیرمش و مجددا بر ملت مجلسی تشکیلی

امر ایدوب بونک ایچون انتخاب اولنه حق اعضا ناک کندو دلخواهی  
 وجهله حرکت و سربستانه مباحثادن مباحثت ایده جکني مأمول  
 ایتش ایسهده بونلر دخی ماده مختلف فیهاده اسلافلرینه حق  
 ویرمشلردر اشته بو وجهله حکومت ایله ملت بیننده اختلاف تا کد  
 ایتدیکندن قرال مشار الیهک اصول مشروطه حکومتی اخلالدن  
 مقصدنه اولدیغنک صراحت کاندولرینه ییلدیرلسنی صورت قطعیه طلب  
 ایتشلردر رئیس وکلا اولان موسیو یسمارقک بوکا ویرمش اولدیغنی  
 صنیهه لو جوابلر صدره شفاویرر قیلدن اولدقدن بشقه رئیس بولندیغنی  
 وکلانک حرکاتی بر قاندها اتهام ایتش اولدیغندن اعضای مومی الیهم  
 ملنک کاندولرینه تودیغ ایتدیکی حقوقی وقایه وکلانک موقع مذاکره  
 وضع ایلدیکی تکالیفه ردقطنی ایله جواب ویرمشلردر

قرال مشار الیهک اولوجهله قوه عسکریه سنی تکثیر ایتنک استمی  
 مقصد آتیدن عبارتدر ظن اولنور شویله که معلوم اولدیغنی اوزره  
 اوستریا ایله پروسیا المانیانک ال بیوک دولتری اولوب بونلر دائمیکد یکرینه  
 تفوق ادعاسیله بینلرنده رقابت اولدیغندن ایتالیا محاربه اخیریه سی  
 مناسبیله اوستریا دولتنک تدنی نفوذ و اعتبارندن برو پروسیا دولتی  
 اوستریا پولیتیکه سند تغلب و تفوق ایتنک داعیه سنه قیام ایتش ایسهده  
 موفق اوله مامش و بو داعیه ایسه بالجه المانیا اهلنسنک اخص  
 امالی اولان هیئت واحده تشکیلی افکارینک تجدیدن نشأت ایدوب  
 قرال مشار الیه شو افکاره خدمت ضمنده کندو اغراضنی دخی ترویج  
 نیثیله لدی الحاجه المانیایی اجانبک تجاوز و هجومندن محافظه  
 ایده بیله جک درجهده قوه عسکریه سنی تکثیره قیام ایتش ایسهده  
 اجراسی فوق المامول مشکلاته تصادف ایدوب روش حاله کوره شو

مقصودك حصولی بعید الاحتمال اولدقدن بشقه دولت ايله ملت بدنده  
تكون ایدن اشبو اختلافك ایلروده برع بدۀ شدیده یی منتج اوله بیلسمدن  
خوف اولمقده در

— 0 —

### (لهستان مسئله سی)

لهستانده ایکی سنه دنبرو اثار عصیان و هیجان کوندن کونه نزاید  
ایدوب بونك اسباب حقیقه سنی تعیین ایتك بر امر دشوار ایسده  
باشلیجه سی دولت لری منقرض اولدیغی کوندنبرو ملت و قومیت افکار یی  
ذرتما غائب ایتامش اولان بر ملتك رقبۀ تابعیتی بر قوم اخرك رقبۀ  
تحمك کداز متبوعیتنه کرفتار اولسی ماده سیدرفی الواقع لهستانك روسیه یه  
التحاق دنبرو لهلول روسیه دولتی حقنده بغض و عداوت لری کتدکجه  
مشند اولوب ایمراطور متوفی نیقوله پاولوویچك زمان حکومتنده لهستانك  
دوچار اولدیغی احوال ملالت اشتماک بعضی مرتبه تحقیق  
و تعدیلی استرحامی ضمننده لهلول طرفندن پترسبورغه کوندریلان  
وکیلار حضور ایمراطوری یه داخل اولدقلرنده مشار الیه « بندن نه  
استدیک کری بیلورم سنك بیانکره حاجت یوقدر اعتمادمه مظهر تکرزی  
استر ایسه کز اجانبدن سزه سرایت ایتکده اولان افکار ردیه و اطوار  
نابسندیده دن مباعده لۀ اولاد و افساسکره مراسم حرمت و رعایتی  
تعلیم و تلقین ایدی کز اولخالده حکومتز طرفندن معامله پدرانیه مظهر  
اولورسکرز فلا و ارشا و شهرینی بر صورتده خالك ايله یکسان ایدر مکه  
خانمانکردن اثر قانز « جوانی و یرمشدن موخرأ شهر مذکور هر نقدر  
اولوجمله تخریب قلمنامش ایسده همحال عرصۀ قتال اولش و بعض  
غزنه لك دیدک لری کبی اراقۀ دماء مظلومین ایچون بر سیاستگاه  
دهشتفرایه دوشمشد

لهستانك

لہستانک اکثر محاررندہ بعض معاملات خونریزانہ تکرر وقوعی بتون  
 لہ ملنک عرق غضبئی تحریک ایلدیکندن زبانہ کش ظہور اولہیلہ جک  
 اتش اختلالک اطفاسیچون اولطرفہ یتش سکسان ییک کشیدن مرکب  
 بر اردو جمع و تشکیله قرار ویرلسش و وارشا و شهری عساکر  
 مستحفظہ سندہ تقویت ویریلہ رک محاصرہ حالہ قونلشدن مؤخرآینہ  
 شهر مذکور اہالہ بسندن بر طاقم کسان بعض مرتبہ شہہ اوزرینہ اخذ  
 و گرفت ایلہ سیر جانہ نفی و تغریب قلمشدر شو حال اوروپانک نظر  
 دقتی جلب ایلدیکندن روسیہ ایمپراطوری برادری غران دوق  
 قسطنطینی اصول سرستی یہ موافق بعض تدابیر مناسبہ اتخاذ  
 ایتمک و ممکن مرتبہ اصول ملیہ لری حقندہ مساعده کوسترمک و اناری  
 خاطر خراش اولان وقوعات سابقہ یی اہالی یہ اونوتدیرہ جق سائر اسبابہ  
 تشبث ایلمک مأموریتیلہ لہستان قائم مقامی نصب و تعیین ایلمشدر  
 قائم مقام مشار الیہ اگرچہ مواعید واقعہ سنی تمامیلہ ایفا ایتماش ایسده  
 بولندیغی موقعک مزاجندہ لایقیلہ مطلع اولورو مأموریتندہ ابقا  
 قنور ایسہ اہالینک میل و محبتی جلب ایدرک بالتدریج اصلاح  
 احوالرینہ موفق اولسی مأمولدر

—0—

(یونان مسئلہ سی)

یونانلور بر از وقتدنبرو قراللری اوتون مأموللری وجہلہ مقدم و غبور  
 و تشبث امورده جسور اولدیقتدن بعض مقاصد ملیہ لری نک ترویجندہ  
 سعی و اہتمام ایتمدرک شمدی یہ قدر یونانستان حقندہ بر کونہ حسن  
 خدمت ایفاسنہ مقتدر اولدی و اجنبیلاک حالندہ قالہ رق بولندیغی  
 حکومت و موقعک اہمینی ادراک ایدہمدی یوللوم شارالہ حقندہ بر طاقم

عجز و قصور انادینه باشلامشرایدی حالبوکه مشار الیه روسیه محاربه  
 اخیره سی اناسنده یونانلرک شو افکار فاسدهلرینی قوهدن فعله اخراج  
 ثبوت ایتش ايسده نهائی حقارنده موجب وخامت اولدیغندن ارتق  
 او مقوله حرکاتدن اجتناب ایتشیدی اشته بو وجهله قرال مشار الیه  
 یونان قرالغنه تعیین ایدن دول معظمه نك مطلوب و دخواهی ايله  
 کندوسنك تحت حکومتمده بولنان ملتک افکار و مقاصدی بیننده  
 مبانیت کلیه درکار اولدیغندن قنغی طرف منافعنی التزام ایده جکنده  
 متحیر و مضطرب بولنمشیدی

یونانستانده مؤخرأ سرزده ظهور اولان وقعه نك مقدماتی بوندن برسته  
 مقدم اناپلیده وقوعبولوب فقط اولوقت عسکری طاقی بیننده اتحاد  
 تام اولدیغندن نتیجه پذیر اوله مبهرق انجق بو یولده بعض غیر تکشیرینک  
 تلفنی مستلزم اولمشیدی اشوناپلی فسادینک اندفاعدن صکره بین الاهی  
 و سائل اختلافک اندفاعیله جمله سی قرال علیه نك وجود و یکجهت  
 اوله رق فرصت مناسبه انتظاریده بولنمشرایدی

قرال مملکتی داخلنده بعض محاربه سیر و سیاحت ایتک اوزره اتنه دن  
 عزیمت ایتش اولدیغنی حالده کچن تشرین اولک یکریمی ایکبسنده  
 بعض ایالتلر اهابسنک بغته پای تخت اوزرینه هجوم ایده جکلری  
 خبری اتنده شیوعبولوب هر نقدر طائفه عسکریه طرفندن بو بایده  
 مخالفت وقوعی ملحوظ بولنش ايسده اهالی قرال علیه نك اتفاقلرینی  
 اعلان و عسکر ايله بینلرنده بر مصادمه خفیفه وقوعندن صکره بونلر  
 ايله اتحاد ایتشلردر و در عقب مجلس اعضاسندن بولغاریس و بحریه  
 وکیلی قاناریس و قدما ی وکلادن روفوس نام ذواتدن مرکب بر حکومت  
 موقته تشکیل و قرال اوتونک خلعی و کرک زوجه سنک و کرک سائر

اعضای خاندانك يونان حكومتی اوزرنده اولان حقوقيك سقوطني  
اعلان ايلديلر

قرال مشاراليه عودتنده صورت حاله واقف اولغله اتنده بر ايكي  
ساعت مسافده واقع يره اسكله سنه چيقي استميرك سوار اولديغي  
اميلي نام يونان سفينه سني ترك ايله انگيز سفان حريه سندن تريسته يه  
كتمك اوزره اوراده بولنان سكيلى اسمنده بر كي يه راكبا اوروپايه عزيمت  
ايلشدر

اشته اوتوز سنه لك بر دولتي بر قاچ ساعت ظرفنده رهين اضمحلال  
ايدن اخلال بوندن عبارتدر عموم اهالي بوياده متحد الافكار  
اولديغندن وقوعات مذكوره كال سرعت ايله اجرا اولنش وينلرنده  
بر مقاوله خفيه سبقت ايتش كي جله سي متحدانه حركت ايتشدر  
حكومت موقته عموم ملت ايله متفقاً ينه قراللق اصولنك محافظه سي  
نبنده در فقط بو مثالو مواد محلي دائره سنده قاله ميوب دول اجنبه  
يبنده نفوذ ياريشني دعوت ايده جك بر مسئله يه منقلب اوله جغي دركاردر  
معلوم اولديغي اوزره ميلادك ييك سكر يوز اوتوز سنه سنده يعنى بوندن  
اوتوز ايكي سنه مقدم دول ضامنه اولان انگيز و فرانسز و روسيه  
دولتلى يونان دولتي تشكيل و بوكا اساس اولق اوزره وينلرنده منعقد  
عهدنامه ده اشبو دول ثلثه ده مسند نشين حكمدارى اولان خاندانلره  
متعلق ذواتك يونان قرالغنى حائز اوله مامسنه دائر بر شرط درج  
ايلشدر در معاهده مذكوره احكامي فسخ اولنديغي حاله دول مذكوره يه  
كوره ميدان خالى قاله جغندن يونانلور هر نقدر كندو افكار مليه رينه  
تبعيت ايتك ارزوسنده ايسه زده مملكترى انگيز و فرانسز و روسيه  
دولتلى پوئينتیه سنه جولانكاه اوله جغي بي اشباهدر روسيه ايمپراطورينك

يكنى دوق دولايختبرغى يونان قرالغنه تكليف ايتسى دخی شو مقصده مبنی اولديغی آکلاشیلو رفقط انکلتره دولتی معاھدہ مذکورہ احکامنک ابقاسی طرفندہ بولندیغندن روسیہ نیک اشبو تکلیفنه موافقت ایتدیکی مثالو قرالچہ نیک ایکنجی اوغلی پرنس الفردک مسند مذکورہ یه نامز دلکنی دخی فطعبارد ایلشدر بونک اوزریتہ روسیہ دولتی مقصد مذکوردن صرف نظرله یک سکر یوز اوتوز سنه سی عهدندہ ثابتقدم اولدیغی بیان ایتش و فرانسه دولتی ایسه ابتدای وقعه دنبر معاھدہ مذکورہ احکامنک خللدن وقایه سی ارزوسندہ اولدیغی درمیان ایدوب بوبایدہ مجادلات واقعه یه قارشماشدر

بر منوال محرر انکلتره دولتی پرنس الفردک یونان قرالغنه تعیننی قبول ایتماش ایسه ده پرنس مشار الیه حقندہ کمال میل ونجذاب اظهار ایدوب شمدی یه قدر انکلتر اداره سندن شکایت ایدن جزایر سبعة اھالیسی دخی یونانستانہ ملحق اولق غرضیلہ بوافکارده بولنمشدر بالسهولہ آکلاشیلہ جغی وجہلہ یونانلورک پرنس الفردی استملری اولابو مناسبتلہ جزائر سبعة نیک یونانستانہ التحاقندہ و ثانیاً انکلتره دولتی کبی بر صاحب نفوذ و اقتدار دولته کسب تعلق وانتساب ایلہ ترویج مراملریتہ دسترس اولق غرضندہ مبیدر انکلتره دولتی غالباً روملرک اصل مقصدلری بو اولدیغی فہم ایدرک حصولی پرنس مشار الیه واسطہ سیلہ مناسب تدارکنہ حاجت اولدیغی اشراب قصدیلہ جزائر مذکورہ یی مجاناً یونانستانہ ترک ایتک نیشدہ اولدیغی مؤخرأ اعلان ایلشدر

اگرچہ جزائر مذکورہ نیک انکلتره دولته بر طاقم بیہودہ مصارفدن بشقہ بر فائدہ سی یوغبسدہ جزائر مذکورہ نیک باشلیجہ سی اولان قورفہ اطہ سی ونیک کورفری جوارندہ واقع بر موقع مستحکم اولدیغی جہتلہ دولت

مشار اليهاك باد هوا ترك و فراغت ايملى زياده مستبعد كورنديكندن  
بو كيفيت جهه نك موجب استغرابى اولمشدر

يونان قرالى انتخاب اولمق اوزره اتنده عقدى مقرر اولان جمعيت  
عموميه بو كونه كنده كشاد اولمش ايسه ده هنوز اعضاسى تكميل اولماش  
وانكلتره دولتى مؤخرأ پورتكيز قرانك پدى بولنان دوق دوساقس  
قوبورغى تنسيب ايمش ايسه ده بعض غره لك رواينه **كوره**  
مشار اليه دخى رد ايمشدر

قرال مخلوع اوتون بجه مشاره پيردن حر كننده (كل شى  
يرجع الى اصله) قاعده سنجه طوغرى وطن اصلبسى اولان باويرايه  
عزيمتله اليوم اوراده كندو حالنده اقامت ايتكمده در

